

PAGESUSI GIYA 5

Tulay Ngadto Sa Kinabuhi Nga Kabuhong

Ilang nakaplagan ang iyang kalabera kilid sa hinimo nga balong-balong diha sa awa-aw nga isla sa tunga-tunga sa Atlantiko. Ang wala maila nga mananagat nakahipos sa pamantalaan diin nakaditalye ang iyang upat ka bulan nga mapait nga kaagi. Siya nakatakda na nga mobalik sa Isla pinaagi sa DUTCH FLEET sa 1725 alang sa daghang wala masulti nga krimen. Dili madugay mapugos siya pag-inom sa dugo sa mga pawikan aron pagtagbaw sa iyang kauhaw. Ang pisikal nga pag-antos sa tawo nagsamot, apan mas dako nga kasakit natala diha sa iyang talaan; ang iyang naghingapin nga sayop.

Iyang gisulat ang nakahasul sa iyang hunahuna nga mga pulong sama sa, “Unsa nga mga ngipon ang mahimo sa mga madunoton ug unsay ilang bation kon sila magapahilayo sa mga dalan sa pagkamatarong, kini magapahamuot ug magadugang ang kadaghan sa mga salawayon.”

Kining dako nga paghilain niini nga mananagat sa mamingaw nga Isla naabot sa iyang panghunahuna ang pagkahumulag gikan sa Dios, kana nagpamatuod nga dili maantos sa katapusan.

Ang katawhan nanlimbasog niana nga pagkahumulag sa kasingkasing sukad si Adan ug Eba “Nitago gikan sa Ginoong Dios ngadto sa kakahuyan sa tanaman” human mikaon sa gidili nga bunga (Genesis 3: 8). Ang talagsaong bag-ong pagbati sa kaulaw, pagbati nga sad-an ug kahadlok maoy nagabugkos sa unang magtiayon sa pagkalagiw palayo gikan sa pagpanawag sa Dios. Kadto nga mga pagbati kasagaran mga pamilyar nga pagabation nato karon. Unsay mga hinungdan ang makapahumulag kanato gikan sa Dios?

“Ang inyong mga kasal-anan maoy nakapahumulag kaninyo ug sa inyong Dios ug ang inyong mga sala nakapatago sa iyang nawong gikan kaninyo.” — Isaia 59:2

Kining dako nga gulpo (luak) nga nakapahumulag sa makasasala nga mga binuhat gikan sa Dios kini dili binuhatan sa Dios. Ang Dios wala modagan gikan kang Adan ug ni Eba, sila ang midagan gikan kaniya.

I. PAGBUSOG SA ATONG TINAGO NGA KAGUTOM

Sa wala pa ang sala makahugaw sa hulagway kon talan-awon, si Adan ug Eba malipayon ug sa kasuod nakig-uban sa ilang magbubuhat/maglalalang sa maanindot nga poloy-anan sa tanaman sa Eden. Apan sa makasusubong hitabo, ilang gipalit ang pamakak sa yawa nga mahimo silang maalam sama sa Dios ug gibugto nila ang bugkos sa paglaum ug pagsalig uban sa ilang magbubuhat (Gen. 3).

Human sila giabog gikan sa Tanaman sa Eden, nakita ni Adan ug ni Eba nga mas lisod ang kinabuhi sa gawas kaysa sulod sa Eden.

Ang pagpanganak ug pagtikad sa yuta karon, kini inubanan sa dugo, singot ug mga luha. Ang ilang kasuod uban sa Dios nabungkag ug nahanaw, ilang nakita ang ilang kaugalingong mga pangandoy nga walay pagkatagbaw ug mapait nga pagkinabuhi diha sa makasusubo nga sala.

Sukad sa unang buhat ni Adan ug Eba nga pagpakasala, “TANAN” (tibuok pasa, bulok sa tawo) nahulog sa samang hulmahan sa pagpakasala nga angay sa kamatayon ang katapusang ganti sa sala.

“Busa maingon nga ang sala misulod sa kalibutan pinaagi sa usa ka tawo ug ang kamatayon misulod pinaagi sa sala, ug nga tungod niini ang KAMATAYON MIKUYANAP NGADTO SA TANANG MGA TAWO sanglit ang tanang mga tawo nakasala ma.” — (Roma 5:12).

Kitang tanan nakasinati sa dakong kagutom sa kasingkasing alang niadtong nawala, usa ka pangandoy nianang kasigurohan nga ang Dios lamang ang makahatag. Ato kanunay gisulayan ang pagtagbaw niana nga kagutom pinaagi sa pagpamalit og mga butang, kabtangan ug bahandi ug pinaagi sa paglingaw sa kaugalingon uban sa alcohol, droga ug mga sagolsagol nga paglingaw sa kinabuhi.

Apan ang tanan natong pagpangabudlay kini mga sintoma sa kamingaw alang sa Dios, ug wala kini’y tambal gawas sa pagsinati sa iyang gugma sa atong kinabuhi.

“Igapakita mo kanako ang dalan sa kinabuhi sa imong presensiya anaa ang kahupnganan sa kalipay sa imong toong kamot adunay mga kalipayan nga walay katapusan.” — (Salmo 16: 11).

Ang tinuod nga pagkatagbaw maga-abot lamang sa dihang ang haw-ang tali sa Dios ug kanato madug-tong aron kita makalakaw ngadto sa iyang presensiya.

2. PAGDUGTONG SA BUNG-AW SA SALA UG KAMATAYON

Ang katawhan maoy masulob-on pinaagi sa sala. Naguol usab ang Dios sa adlaw nga si Adan ug si Eba mitalikod kaniya. Ug sa kanunay siya nagasubo sa mga kagul-anan sa katawhan ug sa ilang mga katalagman. Ang Dios nahingawa sa pagtagbaw sa atong tinago nga mga pangandoy ug sa pag-ayo sa atong emosyonal nga mga samad. Dili siya kontento nga magalantaw kanato nga maloloy-on didto tabok sa bung-aw nga nakapahamulag kanato gikan kaniya. Nakahukom ang Dios nga mahimong tulay pagtabok sa bung-aw sa sala ug sa kamatayon.

“Kay gihigugma gayod sa Dios ang kalibutan nga tungod niana gihatag niya ang iyang bugtong nga anak, aron ang tanan nga mosalig kaniya dili malaglag, kon dili may kinabuhing dayon. Kay gipadala sa Dios ang iyang Anak nganhi sa kalibutan, dili aron ang kalibutan iyang pagahukman sa silot, kon dili aron ang kalibutan maluwas pinaagi kaniya.”—(Juan 3:16,17).

Gihatag sa Dios ang Iyang Anak, ug si Jesus naghatag sa iyang kinabuhi ingon nga halad alang sa sala, nagbayad sa iyang kaugalingon sa kalapasan sa sala. Ang Iyang kinabuhi, kamatayon, ug ang Iyang pagkabanhaw nahimong possible sa kapasayloan ug pagluwas sa makasasala nga wala nay kapuslanan ang sala, ug ipakita sa uniberso ang demonstrasyon sa tinuod nga kinaiya ni Kristo ug Satanas. Ang tulay sa nabun-og, nagadugo nga lawas ni Kristo nagakuha pagbalik sa tawo gikan sa lit-ag sa sala. Ang gugma nagalugwas sa bung-aw nga mahimo sa tanan nga nagabutang sa ilang pagtoo diha kang Kristo ingon nga Ginoo ug Manluluwas sa paglakaw ngadto sa kinabuhing walay katapusan.

3. PITO KA TINUBDAN NGA KAMATUORAN KINAHANGLAN IMONG MAHIBALON MAHITUNGOD NI JESUS

kining pito ka kamatuoran mahitungod kang Jesus dili makita sa ubang tawo nga sukad nagpakatawo niini nga kalibutan:

(1) Si Jesus mianhi gikan sa langit nganhi sa yuta.

Unsa kadugayon si Jesus miangkong nga naglungtad?

“Wala pa si Abraham, mao na ako.”—Juan 8:58.

Si Jesus nagpahibalo sa kalibutan; “Ako mao Ako” sa kanunay ako magalungtad bisan si Jesus natawo sa tawhanon nga inahan (Mateo 1:22,23) siya Dios. Dios sa tawhanon nga unod.

Si Dwight I. Moody, ang Billy Graham sa decinueve (19) ka siglo, nagsulti sa pagkatawo ni Jesus (incarnasyon) “Mahimong usa ka bantugan nga sakripisyo/pag-antos alang kang Jesus ang pag-anhi nga giduyan sa salapi nga duyanan ug gi-atiman sa mga manulonda, ug gipakaon sa bulawanon nga pagkaon, apan ang maglalalang sa langit ug yuta mianhi pinaagi sa unod sa tawo, ug nagpakatawo sa pasungan sa kabus nga ginikanan sa mangil-ad nga palibot.”

Panahon sa pagkatawo ni Jesus gisultihan sa manulonda si Jose.

“Ug giaanak niya ang usa ka bata nga lalaki, ug siya imong paganganlan si Jesus, kay SIYA MAO MAN ANG MAGALUWAS SA IYANG KATAWHAN GIKAN SA ILANG MGA SALA.”—(Mateo 1:21).

Si Jesus ang maglalalang sa uniberso (Juan 1:1-3). Andam nga moanhi sa atong kalibutan aron sa pagluwas kanato gikan sa sala ug kamatayon.

(2) Si Jesus nagpuyo sa walay sala nga pagkinabuhi.

“Si Jesus ang anak sa Dios, gitintal sa bisan unsang paagi, sama kanato. Apan wala gayod makasala.”—Hebreohanon 4:14,15.

Ang Dios naghimo labaw pa sa pagsulay pagkuha kanato pagawas sa pagkinabuhi nga makasasala ngadto sa labaw pa ka matagbawon nga paagi.

Pinaagi sa pagkinabuhi ingon nga tawo, si Jesus naghimo’g kinabuhing gawasnon gikan sa sala sobra pa ka madanihon kay sa bisan unsang sermon nga mahimo.

Si satanas ang kaaway ni Kristo, naglaraw sa tibuok nga pagkinabuhi ni Jesus sa yuta sa pagyudyod kaniya sa pagpakasala. Didto sa kamingawan ang yawa nagbuklad sa iyang pinakamabangis nga plano batok sa iyang integridad (Mateo 4:1-11). Sa Gethsemane sa wala pa siya ilansang, ang bul-og sa tentasyon midangat sa makusog nga pwera, ug si Jesus gisingot sa mga tulo sa dugo. (Lukas 22:44).

Apan si Kristo mibarog nga malig-on batok sa bisan unsang butang ilabay sa yawa ngadto kaniya. Apan sa gihapon “walay sala” tungod kay si Jesus nakasinati sa puno ug sangkap sa tawhanong mga suliran ug mga tentasyon, nasabtan niya ang atong panlimbasog. Takus siya nga “Mo simpatiya sa atong mga

kaluyahon.” (Heb. 4:15).

Nganong kinahanglan alang ni Jesus nga magapuyo sa walay sala nga pagkinabuhi?

“Tungod kanato siya nga wala makasinati ug sala gihimo niya nga sala, aron dili kaniya mahimong pagkamatarong nga anaa sa Dios.”—(2Korinto 5:21).

Nabuntog ni Jesus ang tentasyon ug nagpuyo sa walay sala nga kinabuhi aron iyang mapasa nganhi kanato baylo alang sa atong daan ug makasasala nga kinabuhi.

(3) Si Jesus Namatay aron pagkuha sa Sala.

Pila ka mga tawo ang nakasala?

“Sanglit nakasala man ang tanan ug nakabsan sa himaya sa Dios.” Unsay bayad sa Sala?—(Roma 3:23).

“Ang bayad sa sala kamatayon; apan ang gasa sa Dios kinabuhing dayon diha kang Kristo Jesus nga atong Ginoo.”—(Roma 6:23)

Nganong nagpakamatay si Jesus? “Tan-awa ang kordero sa Dios, nga nagkuha sa sala sa kalibutan.” (Juan 1:29).

Tanan kita nakasala ug angay sa way katapusang kamatayon, apan nagpakamatay si Jesus alang kanato. Siya nahimong sala “alang kanato” Iyang gilukat ang kamatayon alang kanato. Ang Iyang kamatayon gasa, ug ang gasa sa Dios mao ang kinabuhing dayon diha kang Kristo Jesus nga atong Ginoo.” (Roma 6:23).

Gihukas ni Jesus ang Iyang hingpit, matarong nga kinabuhi ingon nga gasa sa gugma alang kanato.

Gugmang way sama nga dili makab-ot sa tawhanong panghunahuna ug tungod sa iyang kamatayon “Kita adunay kalinaw uban sa Dios.” (Roma 5:1)

(4) Si Jesus Nabanhaw gikan sa mga Patay.

Ang kamatayon ni Jesus sa Krus dili katapusan sa Iyang halandumon nga sugilanon. Dili siya magapabilin nga patay ug mahimong atong manluluwas.

“Kon wala pa unta banhaw sa Kristo, nan, ang inyong pagtoo wala untay kapuslanan ug kamo anaa pa unta sa inyong kasal-anan, ug bisan sila nga nangamatay diha kang Kristo mangalaglag lang gihapon.”—(1 Korinto 15:17,18)

Si Mohamad ug si Buddha nagpresentar sa kalibutan sa mga bantog nga pilosopo nga kamatuoran. Ilang gidasig ang minilyon nga kinabuhi sa katawhan, apan wala silay super natural nga gahum paghatag ug kinabuhi, sila nagpabilin lang gihapon sa ilang lubnganan.

Tungod kay si Kristo nabanhaw gikan sa Iyang lubnganan human sa tulo ka adlaw niyang pagkamatatay, unsay saad nga iyang gihimo alang kanato?

“Tungod kay ako nabuhi, kamo usab mabuhi”—(Juan 14:19).

Si Jesus buhi! Tungod kay siya adunay gahom batok sa kamatatayon, iya kitang luwason gikan sa kamatatayon ug mohanyag kanato sa kinabuhi tanan kini abunda ug walay katapusan, siya magapuyo sa atong kasingkasing kon imbitahon ta siya. Ang nabanhaw nga Kristo kanunay presente aron sa pagtubag sa atong panginahanglan karon.

“Tan-awa ako maga-uban kaninyo sa kanunay hangtod sa katapusan sa kapanahunan.” (Mateo 28:20).

Mga lalaki ug mga babaye sa tibuok kalibutan nakigpahat sa mga sugilanon kong giunsa ni Kristo pagluwas sila gikan sa mangil-ad nga mga adeksiyon ug sa pinakalawom nga trauma sa emosyon.

Usa sa kanhi nga studyante nagsulat niining mga pulonga sa pagtahod sa usa sa iyang tubag, “Ako usa ka palahubog, usa ka adlaw samtang hubog, akong nakita usa ka kard diha sa kanal, nagpahibalo sa inyong Bible Course. Ako kining gipunit, gisulatan ug midawat sa akong unang tinuod nga kahibalo kang Kristo. Sa wala madugay human pagkuha nako sa Bible Course. Akong gihanyag ang akong kasingkasing ngadto sa Dios ug nawala ang lami alang sa bino.”

...Sa diha nga mo posesyon si Jesus sa kinabuhi niini nga tawo, usa ka bag-o nga gahum gihatag kaniya ang abilidad sa pagbuntog sa iyang pagka-addict. Tungod kay si Jesus ang nabanhaw nga manluluwas, iyang maluwas ang tanan nga moduol kaniya alang sa panabang.

(5) Si Jesus Mikayab Ngadto sa Langit

Sa wala pa mobalik si Jesus ngadto sa iyang Amahan human sa Iyang pagkabanhaw (Buhat 1:9). Nag-saad siya sa iyang mga tinun-an.

“Kinahanglan dili magkaguol ang inyong kasingkasing, sumalig kamo sa Dios, ug sumalig usab kanako. Sa balay sa akong Amahan anaay daghang puy-anan, moadto ako aron PAG-ANDAM UG LUNA ALANG KANINYO. Moanhi ako pag-usab pagkuha ninyo aron asa ako, toa usab kamo.”—(Juan 14:1-3).

(6) Si Jesus Nag Ministeryo ingon nga Langitnong Pari

Si Jesus kanunay nangita aron pag-andam alang kanato luna didto sa langit.

“Busa kinahanglan pagahimoon siya sa tanang kahimtang mahisama sa iyang mga igsoon, aron mahimo siyang kasaligan ug maloloy-on LABAWNG SASERDOTE diha sa pagpang-al-agad alang sa Dios paghimo’g halad pasiuli alang sa mga sala sa katawhan. Tungod kay siya nag-antos sa duha nga gipangtintal.”—(Hebreohanon 2: 17-18).

Si Jesus mianhi sa atong kalibutan aron sa “Paghimo sa pakigsaad alang sa kasal-anan sa katawhan,” ug pagluwas kanato gikan sa kaulipnan sa sala. Nagpakamatay siya aron pagluwas kanato aron sa dayon iyang mapapas ang hinungdan sa sala, pag-antos, ug kamatayon pinaagi sa paglaglag sa yawa.

Si Jesus ingon nga atong labawng Pari “Mihimo sama sa iyang mga igsoong lalaki sa bisan unsang paagi” ug karon nagpakita kanunay sa presensiya sa Amahan alang kanato ingon nga tigpataliwala. Siya mao si Jesus nga nagpanalangin sa mga kabataan, nagbag-o sa babaye nga naaktohan sa pagpanapaw ug nagpasaylo sa himatyon nga kawatan didto sa krus, karon nagabuhat sa langit sa pagministeryo sa atong mga gikinahanglan, “Ang pagtabang niadtong mga gipangtintal.”

(7) Si Jesus Gayud Mobalik

Unsay gisaad ni Jesus sa wala pa siya mobalik sa langit?

“Kon moadto ako ug mag-andam ug luna alang kaninyo, MOBALIK AKO ug kuhaon ko kamo uban kanako, kon diin ako atua usab kamo.”—(Juan 14:3).

Kon si Jesus mobalik, luwason kita Niya gikan sa sala, mga sakit, katalagman ug kamatayon, nga nahampak niini nga planeta. Ug Iya kitang abi-abihon ngadto sa bag-ong kalibutan sa walay katapusan nga kalipay ug way pagkadunot nga kinabuhi.

4. WALAY PAGKAPAKYAS NGA GUGMA

Usa ka sugilanon sa usa ka naandam nga kasal didto sa Taiwan tali kang U Long ug usa ka ka batan-on nga dalaga ginganlan ug “Golden Flower”

Sa diha nga gibuksan ni U Long ang tabon sa nawong sa iyang gipakaslan human sa kasal, nakurat siya ug natingala. Ang iyang nawong napuno sa uwat sa Smallpox, human niadto si U Long wala na gayod ganahi sa iyang asawa; paningkamot sa asawa nga iyang malipay siya; gihimo niya ang tanan sa panimalay sa paglaum nga malipay ang iyang bana ug dawaton siya. Apan nagpabilin si U Long nga bugnaw ang pagtagad, pagbati sa tanan kaayohan ug pag-amuma sa iyang asawa.

Sulod sa dose (12) ka tuig niining salingkapaw nga kaminyo-on, nagsugod ug kawala ang panan-aw ni U Long. Miingon ang Doctor kaniya, nga mabuta gayud siya maoperahan sa Cornea Transplant.

Apan ang pagpa-opera mahal kaayo ug taas pa gyud ang listahan sa nagpaabot nga magpa-opera.

Si Golden Flower nagsugod ug pangabudlay pagtrabaho sa overtime nga mga oras hangtod sa gabii paghimo’g mga kalo aron makatigom ug kwarta, usa ka adlaw niana, gisultihan siya nga adunay magamit nga Cornea alang kaniya sa usa ka tawo nga na-aksidente, busa miadto siya sa ospital aron mahimo ang operasyon.

Human sa malampuson nga operasyon, uban sa dili maayo nga pagbati nakahukom siya pagpakigkita sa iyang asawa aron makapasalamat kaniya sa naipon nga salapi ug sa mga gasto sa operasyon. Sa pagliso ni U long sa nawong sa iyang asawa aron makakita kaniya, se U long nahugno ug gikutasan. Ang iyang asawa mihangad kaniya nga wala nay mga mata. Nahugno sa iyang pagbati si U long miluhod sa atubangan sa iyang asawa ug mihilak, ug sa unang higayon sukad sa ilang kasal si U long mihonghong sa ngalan sa iyang asawa; “Golden Flower.”

Si Jesus nangandoy niana nga relasyon niadtong walay pagtagad kaniya sa dugay nang panahon. Nangandoy siya kanato, nga sa katapusan kita makahonghong sa iyang ngalan ingon nga atong manluluwas. Andam siya sa pag-antos dili lang ang Iyang mga mata kon dili ang tibuok niyang lawas aron ipakita ang iyang walay pagkapakyas nga gugma.

Ang Iyang gugma gamhanan kaayo nga si Kristo “Mianhi sa kalibutan sa pagluwas sa mga makasala.” (1Timoteo 1:15)

Ang dakong pag-antos ni Kristo nakahimo ug tulay nga nagadugtong sa atong walay pagtagad kaniya nga nagatabon sa atong pagkalangyaw. Sa katapusan imong nasuta ug nadiskobre nga gusto Niyang hawason ikaw gikan sa bung-aw aron sapnayon sa Iyang mga bukton, ikaw ba motubag ug mag-ampo "Jesus gihigugma ko ikaw. Salamat sa Imong kahibulongang pag-antos."

Sumulod ka sa akong kasingkasing ug luwasa ako karon, luwasa ang akong kinatibuk-an, luwasa ako sa hingpit, luwasa ako sa kahangturan.